

Li travô di bardjé d'alpâdze

Din li z'alpâdze, li travô son teti li mimoueu tote la saïzon. Mè vouaï vouo prèdjé dè hleü dè l'alpâdze dè Saye.

Li dzornive kemins'on dè bouon'eure. A traï z'eure i fô prindre li bidon pouo keminsié a ariâ tînke pè vè li saï z'eure. Apri li bardjé von dédzonnâ é apraï avaï fouernaï dè medjé, li vatsèrou démand'on u dou z'âtre bardjé d'alâ déyètâ li vatse pouo li menâ in tsan.

Le petchou vatsèrou din la matenâye daï fire le râhlabeûze, sin kiè veü dere, nètèyé li beü. I va a Salintse mètre l'ivoueu din la raye kiè l'âruvè daraï le beü, i fi pasâ l'ivoueu din li rianne pouo boueyâ é la kive l'âruvè din la fôse pouo êrdjé li konsi.

Le pâtre lui fi la kazenâye dou kou pè dzo, matîn é ni tînk'a pouo pri la mètcha de la saïzon, apri on kou pè dzo : i daï prèsâ li fremâdze, pèzâ, markâ le paï, li numèrô, dèvan dè li portâ u grenâ é li salâ.

Kan li fremâdze son fouernaï d'itre salâ, on dzo i li boueye, on dzo i li vreye é sose totè la saïzon. Le manpâ édje le pâtre a la tsavane é u grenâ.

Le portché lui fi li travô dè la tsavane, fi kouaïre l'ivoueu pouo boueyâ, bidon, taïle, sahle a fremâdze, frînzieü é faïsale é kan le pâtre l'a fouernaï dè fabrekâ le sèri, i vouide la tsôde avoui on bidon din on boueu, di li partè bâ pè le teyo kiè va din le bouyè u beütson di kayon. Apri i nètèye la tseüdaïre avoui dè hlîndre.

Le sorvin dè bou prepâre tchui li dzo le bou pouo le fire sètché su le taï dè la tsavane, kâ la rêmouintse a Koupel sè fi u keminsèmin du maï d'ou é i fô kè le bou suse sè. Le sorvin du bou é le portché i dèy'on fire la kouorse dou kou pè dzo. Le matîn i part'on dè Saye a traï z'eure, li kritse tchardjaye dè bou, di sahle a fremâdze é falive pâ ublâ la faïsale. I z'âruv'on a Koupel kin i keminse a arbêyé, le tin dè détchardjé li kritse i fô dja keminsié a ariâ. Apri le dédzonnâ, i fô tchardjé li fremâdze é le sèri, li iètâ du avoui on kordi é inmouodâ du lô dè Saye. Bâ pè dézo l'éthêrtse, i fô alâ bâ tsôpou parskè le vayon l'ére raïde. Arevô bâ in Saye i fô fire to li travô du pâtre.

Apri denâ i dèy'on inkouo tchardjé li kritse é tornâ inô, pouo arevâ a traï z'eure é keminsié a ariâ. Pè vè li saï z'eure i torn'on bâ pouo le daraï kou dè la dzornive.

L'è dînse kiè sè pasâve la via di mèsâdze din le tîn.